



Mario nia sasán

Mario la hadi'a nia kuartu. Nia sasán sira hirus tebes nia tanba nia la rai sira iha ida-idak nia fatin. Sira sente abandonadu no triste. Saida mak sira bele halo hodi Mario bele realiza nia hahalok?




Mario nia sasán
Niraj Balamí and Balkoseli Group


Let's Read



The Asia Foundation



Iha sidade rame ida ne'ebé dook, iha uma barak tebes. Iha uma ida iha kuartu ida mak pertense ba mane ida ho naran Mario.



Maske nia kuartu ne'e furak no luan, nia kuartu ne'e runguranga loos. Mario nia sasán soe arbiru de'it. Roupá sira la tara iha fatin, maibé soe de'it iha rai.




Surat-tahan no livru sabraut hotu iha armáriu livru nian. Lapizeira, tinta fatin, kopu hemu nian no tezoura sira ne'e soe arbiru de'it. Iha mós hudi nia kulit ne'ebé soe hela iha rai.




Mario nia sasán sira sente nervozu no laran-moras. Sanan, ne'ebé halo husi rai, hanoin ba nia-aan, "Tanba sá mak Mario la tau ami iha ida-idak nia fatin? Nia la preokupa ona ho ami?"



Pás iha momentu ne'ebá, relójiu ne'ebé tau iha armáriu leten monu tuun ba rai no harahun sanan ne'e. Lian nakfera ne'ebé maka'as halo sasán hotu-hotu iha Mario nia kuartu laran nakdoko hotu.



Relójiu ne'e tauk tebes. Nia liman sorin naksobu tiha husi nia monu.
Relójiu sorte a'at! Nia la monu mesak. Mario mak tau nia besik liu iha
armáriu ninin.



Kopu hemu nian mós sente tauk tebes. Nia hatene katak tezoura tuur besik nia. Tezoura nia tutun kro'at ne'e besik nia.




Kopu tanis ho ta'uk hodi dehan "Favór ida hadook ó-nia kro'at ne'e husi ha'u!" Tezoura hataan, "Ne'e la'ós ha'u-nia sala, Mario mak tau ha'u iha ne'e. Ha'u atu halo saida?"

Kamiza hakilar maka'as ba hudi dehan "Oh! Hudi sai husi ne'e, se lae ó bele hafoer ha'u!"Sira hotu lamenta ho lian ida de'it hodi dehan,"Buat sira ne'e akontese tanba Mario. Depois de uza ita, nia la tau ita ba ita-nia fatin ne'ebé loloos no nia lamenta wainhira nia buka ita la hetan".





Iha loron ida, Mario hakarak hakerek karta ida. Maibé, nia la hetan nia lapizeira. Nia murmura no komesa sobu sasán sira hotu no buka lapizeira iha nia kuartu ne'ebé runguranga. Ikus mai, nia hetan duni lapizeira ne'e no hahuu hakerek.




Depois dé Mario hakerek hotu tiha iha karta ne'e, nia atu taka lapizeira ho lapizeira nia matan, maibé nia la konsege hetan. Lapizeira matan ne'e lakon tiha ba ne'ebé? Lapizeira matan ne'e nakdulas tiha ba nia kama okos, maibé la hasai lian. Nia sente insultadu tanba Mario abandona tiha nia. Mario sai ba daudaun atu manda karta ne'e.



Baruk ona ho Mario nia hahalok, sasán sira iha nia kuartu hahuu halibur hamutuk hodi halo enkontru.




Enkuantu Mario nia sasán sira diskute malu hela, Mario filafali no atu tama ba nia kuartu. Nia haluha tiha ninia karteira. Wainhira nia atu tama ona kuartu, nia rona lian husi nia kuartu laran. "Na'ok-teen mak tama ona ha'u-nia kuartu karik?" Nia hanoin. Nia hakbesik nia-aan ho neneik ba odamatan hodi rona ho momoos.




Lapizeira mak ko'alia uluk, nia liafuan todan ho sériu, "Kolega sira, ita tenke halo buat ruma ba situasaun ida hanesan ne'e!" Kamiza, latan hela ba rai no hateke ba kabidu dehan, "Mario sempre soe ami ba mai".



Livru hahuu tanis, "Ha'u-nia pájina sira kuaze naklees hotu. Labarik ki'ikoan de'it mós hatene oinsá atu kuidadu ha'u, maibé Mario soe ha'u arbiru de'it. Ita atu husik de'it nia hahalok ida hanesan ne'e?"



Livru dehan, "Lapizeira, hakerek ba Mario katak ita sei la nonook tan ona. Nia tenke muda nia hahalok. Hakerek ho letra boot no letra metan atu nune'e Mario bele haree klaru ita-nia mensajen."



Ho dada-iis maka'as, lapizeira dehan, "Ha'u la bele hakerek ho ha'u-nia aan rasik, ema ruma tenke kaer ha'u iha sira-nia liman."Sira hotu sente triste, "Oinsá mak ita atu hatete ba Mario kona-ba saida mak ita sente?"



Mario - ne'ebé rona nia sasán sira-nia diskusaun husi liur - tama ba nia kuartu laran. Nia haree sasán sira runguranga iha nia fatin no nia komesa sente moe.



Agora Mario nia kuartu la runguranga ona. Nia kamiza sempre tara iha fatin. Livru no surat-tahan sira tau didi'ak iha fatin. Relójiu, tinta, kopu no tezoura iha ida-idak nia fatin. Mario kontente tanba nia bele hetan saida mak nia hakarak ho lalais no fásil tebes. Mario nia sasán sira mós kontente hotu, sira bele ba ida-idak nia fatin.



Endorsed by:
The Ministry of Education, Youth and Sport, Timor-Leste



Supported by:



Brought to you by

Let's Read is an initiative of The Asia Foundation's Books for Asia program that fosters young readers in Asia and the Pacific.

booksforasia.org To read more books like this and get further information, visit letsreadasia.org.

Original Story जुंगेदै के चीजें (Joongedai's Things), Author: Niraj Balam and Balkoseli Group. Illustrator: Sujan Chitrakar. Published by Room to Read, <https://storyweaver.org.in/stories/41056-joongedai-ko-kotha> © Room to Read. Released under CC-BY-4.0.

This work is a modified version of the original story. © The Asia Foundation, 2020. Some rights reserved. Released under CC-BY-4.0.

For full terms of use and attribution,
<http://creativecommons.org/licenses/by/4.0/>